

Poribljavanje ribolovnih voda Bosne i Hercegovine u 1971. godini

Akcija, koju već punih devet godina sprovodi Savez sportskih ribolovaca BiH, da organizirano i zajednički sa svojim udruženjima poribljava ribolovne vode, dala je i u prošloj 1971. godini veoma dobre rezultate. Savez je uspio da u 1971. godini u zajednički plan uključi direktno ili preko Zajednica korisnika ribljeg fonda 50 udruženja i još nekoliko drugih korisnika ribljeg fonda.

Rezultati rada i napora Saveza sportskih ribolovaca BiH i njegovih članica na realizaciji zajedničkog plana poribljavanja ribolovnih voda za 1971. godinu najbolje se ogleda u slijedećim pokazateljima:

U ribolovne vode Bosne i Hercegovine puštene su slijedeće količine mlađi i matične ribe:

| | |
|--|----------------|
| 1. Potočne pastrve mlađi 2—4 cm | 132.000 komada |
| 2. Potočne pastrve mlađi 4—8 cm | 605.600 „ |
| 3. Dvogodišnjepotočne pastrve | 16.700 „ |
| 4. Mekousne pastrve mlađi | 95.000 „ |
| 5. Dužičaste pastrve mlađi | 97.650 „ |
| 6. Jezerske zlatovčice mlađi | 125.000 „ |
| 7. Lipljana mlađi 4—8 cm | 110.300 „ |
| 8. Glavatice mlađi | 15. 000 „ |
| 9. Mladice mlađi | 4.000 „ |
| 10. Matične ribe i mlađi (ljuskavi šaran, stuka, linjak i karas) | 4.948 kg |

Pored ovih količina riba, investitor HE »Trebišnjica«, izvršavajući svoje obaveze, poribio je Bilečko i Trebinjsko jezero slijedećim količinama mlađi:

| | |
|-----------------------------|----------------|
| 1. Potočne pastrve mlađ | 100.000 komada |
| 2. Dužičaste pastrve mlađ | 58.000 „ |
| 3. Jezerske zlatovčice mlađ | 100.000 „ |
| 4. Durmitorska jez. pastrva | 110.000 „ |

Valja napomenuti, da je obim poribljavanja u 1971. godini ostao gotovo na nivou obima iz 1970. godine, unatoč činjenici da su korisnici ribljeg fonda morali angažirati veliki dio sredstava svojih fondova za unapređenje ribarstva za plaćanje izrade ribarskih osnova. Za izradu ribarskih osnova angažirano je ukupno 302.068.— dinara.

Udruženja sportskih ribolovaca Bosne i Hercegovine i njihove zajednice uložile su znatna sredstva i mnogo truda da bi se nabavila iu njihovim mrestilištima proizvela mlađ salmonidnih vrsta riba za realizaciju ovako obimnog plana poribljavanja. Međutim, bilo bi neskromno ne odati puno priznanje i Izvršnom vijeću SR BiH, koje je i prošle godine, u okviru mjera za unapređenje ribarstva, odijelilo Savezu 117.000.— dinara za realizaciju republičkog programa unapređenja ribarstva. Ova sredstva iskorišćena su u vidu priznavanja participacije u troškovima poribljavanja svim organizacijama, koje su se uključile u zajednički plan poribljavanja i koje su ispunile određene uslove za korišćenje participacije.

Vrijedno je napomenuti da su sve količine mlađi salmonidnih vrsta riba, osim mlađi lipljena i dvogodišnje potočne pastrve koja je nabavljena od Zavoda za ribištvo Ljubljana, proizvedene u ribogojilištima i mrestilištima SR BiH. Međutim Savez i njegove organizacije preduzimaju nužne mjere da se poveća proizvodnja mlađi salmonidnih vrsta riba, a posebno da se što prije osvoji proizvodnja mlađi lipljena i mladice, jer za to postoje svi uslovi (dobra matična baza).

Sve akcije unapređenja ribarstva Savez sportskih ribolovaca BiH sprovodi preko svoje Komisije za unapređenje ribarstva. Komisija je preuzela svu brigu

oko ugovaranja, nabavke, premija i transporta mladi i matične ribe za poribljavanje. Svake godine komisija već u proljeće organizira sastanak sa najvećim ribogojnim objektima radi dogovora o cijenama, načinu, vremenu i obimu isporuke i garantira im otkup svih proizvedenih količina mladi. Ova mjera se je pokazala kao vrlo korisna, jer se sprečava neopravdano povećanje cijena mladi i matične ribe.

Komisija Saveza pruža organizacijama veliku pomoć pri kvalitetnom i kvantitetnom prijemu mladi u ribogojnim objektima i pri samom poribljavanju.

Veći broj organizacija nema iskustva u tom radu te je pomoć komisije Saveza i te kako dobro došla. Komisija omogućava i malim udruženjima, koja raspolazu sa malim i ograničenim sredstvima, da nabave i vrlo male količine ribe za poribljavanje, što inače one same ne bi mogle da učine. Baš radi toga se iz godine u godinu povećava broj udruženja, koja se uključuju u zajednički plan poribljavanja i udruženja su vrlo zadovoljna radom Saveza i pomoći koju im on pruža oko akcije poribljavanja.

Milan Vinterhalter — Sarajevo